

Fundashon Wegá di Number Bonaire (FWNB) ta finansíá e proyekto Renobashon di proyekto Pal'i di Tamarein a inisiá

Den kompania di diputado enkargá ku deporte, Timoteo Silberie, Fundashon Wegá di Number Bonaire (FWNB), djamars, 25 di ougùstùs 2026, a desvelá e bòrchi di konstrukshon ku ta duna inisio na e promé fase di e trabounan di rekonstrukshon di e tereno di deporte, konosí komo Pal'i Tamarein. Pa e promé fase akí, FWNB ta pone un montante di 700 mil dòler disponibel, ku ta enserá konstrukshon di un fasilidat i kancha di deporte multifunshonal, apto pa praktiká futbòl, rugby, hockey i frisbee.

Proyektonan duradero

Durante 34 aña largu FWNB ta dunando duna aporte finansiero na organisashonnan riba tereno di deporte, kultura, obranan karitativo i enseñansa, pa entre otro kompetensia lokal, unifòrm, material i biahe pa representá Boneiru na kompetensianan ofishal den eksterior.

Mirando sinembargo desaroyonan riba partikularmente tereno deportivo i e nesesidat kresiente na fasilidatnan deportivo riba nos isla ku ta kuadra ku eksigensianan, FWNB ta kambiando su maneho di donashon. Na lugá di duna donashon na organisashonnan individual so, ta bai hinka e plaka di komunidad bèk den proyektonan duradero i visibel, na bienestar di henter komunidad. E proyekto di renobashon di kompleho deportivo Pal'i Tamarein ta e promé proyekto den e kuadro akí, i ta kuadra kompletamente ku e vishon akí di direktiva i direktora di Fundashon Wegá di Number Boneiru.

Den e siguiente fasenan di e proyekto Renobashon di Pal'i Tamarein, lo sigui traha riba e infrastruktura rònt di e kompleho. Ehekushon di e proyekto ta tuma lugá den estrecho kooperashon di e sekshon di deporte di entidat públiko Boneiru, Indebon. Ehekushon di e proyekto ta den man di kompania di konstrukshon i desaroyo boneriano, Deco N.V. (Development & Construction B.V.) i Edelgrass. Ta spera ku pa final di oktober e promé fase di e proyekto ta finalisá i entregá.

Kontribushon indispensable

Den transkurso di su eksistensia di kasi 35 aña -otro aña ta spera di selebrá e hubileo akí en grande-, FWNB su kontribushon na komunidad a bira hopi grandi i indispensable. Ku diferente kontribushon balioso, FWNB a logra laga hóbennan demostrá nan talento riba tarima internashonal, loke a kondusí na momentunan di alegria i di orguyo. Tambe a logra konstruí i apoyá organisashonnan kaminda hóbennan por desaroyá di un forma sano i floresé den bida.

Hopi organisashon anualmente ta dependé di sosten di FWNB. Pa e promé mitar aña di 2026 ya kaba FWNB a duna 527,289 dòler bèk na komunidad, inkluyendo e proyekto di renobashon di Pal'i Tamarein. Esaki ta pone tambe ku e periodo benidero FWNB lo ta bai mas kouteloso ku donashon i lo kontribuí solamente ku proyektonan nesesario i importante.

Kumpra number legal

Un bia mas FWNB ke enfatisá ku e logronan grandi akí, ta danki na komunidad boneriano ku ta kumprando number legal. Dor di invertí huntú den nos komunidad, FWNB ta sigui yuda krea oportunidatnan pa e generashon ku lo forma nos komunidad mañan.

E fotonan ta duna un imágen di e desvelo di e bòrchi di e proyekto na Kaminda Gurubú

Nota pa redakshon: pa mas informashon tokante e proyekto akí i otro pregunta, por tuma kontakto ku sra. Anne Marie Mercera, direktor di Fundashon Wegá di Number Bonaire na telefon 7174620 òf manda un e-mail pa a.m.mercera@bonairelottery.com